

國小三年級 月榭 宋·朱 熹

月色三秋白，湖光四面平。與君凌倒影，上下極空明。

國小四年級 對月 唐·姚 合

銀輪玉兔向東流，瑩淨三更正好遊。一片黑雲何處起？皂羅籠却水精毬。

國小五六年級 新月 唐·方 干

入夜天西見，蛾眉冷素光。潭魚驚釣落，雲雁怯弓張。隱隱臨珠箔，微微上粉牆。更憐三五夕，仙桂滿輪芳。

國中組 月圓 唐·杜 甫

孤月當樓滿，寒江動夜扉。委波金不定，照席綺逾依。未缺空山靜，高懸列宿稀。故園松桂發，萬里共清輝。

高中組楷書 八月十六夜翫月 宋·孔平仲

團團冰鏡吐清輝，今夜何如昨夜時？只恐月光無顯晦，自緣人意有盈虧。風摩露洗非常潔，地闊天高是處宜。百尺曹亭吾獨有，更教玉笛倚欄吹。

高中組行書 把酒問月 唐·李 白

青天有月來幾時？我欲停杯一問之。人攀明月不可得，月行却與人相隨。皎如飛鏡臨丹闕，綠煙滅後清輝發。但見宵從海上來，寧知曉向雲間沒。白兔擣藥秋復春，嫦娥孤棲與誰鄰？今人不見古時月，今月曾經照古人。古人今人若流水，共看明月皆如此。唯願當歌對酒時，月光長照金樽裏。

大專組楷書 瓊島春雲 明·楊 榮

仙島依微近紫清，春光澹蕩暖雲生。乍經樹杪和煙濕，輕覆花枝過雨晴。每日氤氳浮玉殿，常時縹緲護金莖。從龍處處施甘澤，四海謳歌樂治平。

大專組行書 題春雲出谷圖 金·党懷英

春雲乍出山有無，春雲已去春山孤。山光空濛不可寫，正要雲氣相縈紆。山吞雲吐變明晦，半與巖谷生朝晡。輕陰霏霏暗谿樹，餘影漠漠開樵居。舟人艤棹並沙尾，坐看縹緲搖空虛。巧分天趣出畫外，韻遠不與丹青俱。今人重古不知畫，但愛屋漏煙煤污。惜哉！東坡不及見此本，獨有疊嶂煙江圖。

社會組楷書 慶雲見 唐·李 紳

禮成中岳陳金冊，祥報卿雲冠玉峰。輕未透林疑待鳳，細非行雨詎從龍？卷風變彩霏微薄，照日籠光映隱重。還入九霄成沆瀣，夕嵐生處鶴歸松。

社會組草書 白雪歌送武判官歸京 唐·岑 參

北風卷地白草折，邊城八月即飛雪。忽如一夜春風來，千樹萬樹梨花開。散入珠簾濕羅幕，狐裘不暖錦衾薄。將軍角弓不得控，都護鐵衣冷難著。瀚海闌干百丈冰，愁雲慘澹萬里凝。中軍置酒飲歸客，胡琴琵琶與羌笛。紛紛暮雪下轅門，風掣紅旗凍不翻。輪臺東門送君去，去時雪滿天山路。山迴路轉不見君，雪上空留馬行處。